

142

6. ágúst

Ákvæðum skipulagsskrár þessarar má breyta ef $\frac{3}{4}$ sýslunefndarmanna Norður-Þingeyinga á aðalfundi samþykkja breytinguna. 1.—3. grein skulu þó ávallt haldast óbreyttar.

Þannig samþ. á aðalfundi sýslunefndar Norður-Þingeyjarsýslu 14. júlí 1941.

J. Havsteen,

sýslumaður í Þingeyjarsýslu.

143

7. ágúst

Staðfesting ríkisstjóra Íslands á skipulagsskrá fyrir „Minningarsjóð Benedikts Blöndal á Hallormsstað“, útgefin á venjulegan hátt að mandatum af dóms- og kirkjumálaráðherra 7. ágúst 1941.

Skipulagsskráin er þannig:

SKIPULAGSSKRÁ

fyrir Minningarsjóð Benedikts Blöndal á Hallormsstað.

1. gr.

Sjóðurinn heitir Minningarsjóður Benedikts Blöndal.

Stofnendur sjóðsins eru:

Kaupfélag Héraðsbúa á Reyðarfirði, Búnaðarsamband Austurlands og búnaðarfélagin á sambandssvæðinu.

Sjóðurinn er stofnaður á aðalfundum Kaupfélags Héraðsbúa og Búnaðarsambands Austurlands árið 1939, dánarari Benedikts Blöndals.

Stofnfé sjóðsins er 3000 krónur frá Kaupfélagi Héraðsbúa, 1000 krónur frá Búnaðarsambandi Austurlands og 2000 krónur frá búnaðarfélagunum, samtals 6000 krónur.

Stofnendur sjóðsins fólu forstöðukonu Húsmæðraskólans á Hallormsstað, skólaraði þess skóla, framkvæmdarstjóra Kaupfélags Héraðsbúa og formanni Búnaðarsambands Austurlands að ákveða sjóðnum verkefni, er væri í anda Benedikts Blöndal og geymdi sem bezt minningu hans.

2. gr.

Sjóðurinn er afhentur Húsmæðraskólanum á Hallormsstað til fullrar eignar og umráða innan þeirra takmarka, sem skipulagsskrá þessi ákveður.

Sjóðurinn er afhentur í peningum.

Hann skal ávaxta á öruggan hátt, svo sem stjórn hans telur hagkvæmast.

Höfuðstól sjóðsins má aldrei skerða.

Næstu 10 árin skal $\frac{1}{4}$ vaxtanna árlega lagður við höfuðstólinn.

Að 10 árum liðnum skal skipulagsskráin endurskoðuð og þá ákveðin meðferð höfuðstóls og vaxta eftir því, sem henta þykir, sjá þó 3. gr. Skal skipulagsskráin endurskoðuð af sömu aðilum er sömdu hana.

3. gr.

Starfsvið sjóðsins skal ávallt vera að prýða, rækta og bæta umhverfi Húsmæðraskólans á Hallormsstað.

Árlega skal verja $\frac{3}{4}$ vaxta sjóðsins á þenna hátt næstu 10 árin (sjá 2. gr.).

Fyrsta vaxtaúthlutun fer fram árið 1941 af vöxtum sjóðsins fyrir árið 1940.

4. gr.

Skólaráð Húsmæðraskólans á Hallormsstað hefur á hendi yfirstjórn sjóðsins, en að öðru leyti hefur forstöðukona skólans ráðsmennsku hans og reikningshald á hendi.

5. gr.

Verði Húsmæðraskólinn á Hallormsstað lagður niður, skal stjórn skólans, um leið og búi hans verður ráðstafað, ákveða sjóðnum verksvið, er sé til eflingar ræktun og menningarmálum á Fljótsdalshéraði.

6. gr.

Leita skal konunglegrar staðfestingar á skipulagsskrá þessari.

Staðfesting ríkisstjóra Íslands á skipulagsskrá fyrir „Gjafasjóð Sigríðar Ásgeirs- dóttur“, útgefin á venjulegan hátt að mandatum af dóms- og kirkjumálaráðherra 1. ágúst 1941.

Skipulagsskráin er þannig:

SKIPULAGSSKRÁ

fyrir Gjafasjóð Sigríðar Ásgeirsdóttur.

1. gr.

Sjóðurinn er stofnaður samkvæmt gjöf Sigríðar Ásgeirsdóttur, og er 1. janúar 1941 að upphæð kr. 3691.14.

2. gr.

Tilgangur sjóðsins er að styrkja sjúklinga á Vífilsstaðahæli, og til þess að styrkja þurfandi sjúklinga, er þeir útskrifast af hælínu.

3. gr.

Sjóðurinn skal ávaxtaður í Söfnunarsjóði Íslands, Landsbanka Íslands, eða á öðrum jafntryggum stað, á þann hátt, er arðvænlegast þykir.

Árlega leggist $\frac{1}{4}$ hluti vaxta við höfuðstólinn, en $\frac{3}{4}$ hlutum sé úthlutað til sjúklinga Vífilsstaðahælis, og skal að minnsta kosti helming þess fjár úthlutað í júní- eða júlímánuði ár hvert.

4. gr.

Stjórn sjóðsins skipa 3 menn: Yfirlæknir hælisins, einn skipaður af dóms- og kirkjumálaráðuneytinu, og formaður félagsins „Sjálfsvörn“ á Vífilsstöðum. Hætti félagið „Sjálfsvörn“ störfum, kjósa sjúklingar einn mann úr sínum hópi í stjórn sjóðsins.

5. gr.

Stjórn sjóðsins ber að halda gerðabók fyrir sjóðinn, og færa í hana skipulagsskrá, fundarsamþykktir, og annað, sem varðar hag og rekstur sjóðsins. Sjóðstjórninni ber enn fremur að halda bók yfir eignir sjóðsins, tekjur hans og gjöld, og færa í hana ársreikninga sjóðsins.

6. gr.

Sjóðurinn stendur undir umsjón dóms- og kirkjumálaráðuneytisins, er skipar 2 endurskoðendur, úrskurðar reikninga sjóðsins og gerir allar nauðsynlegar ráðstafanir til þess að úrskurði þess sé framfylgt.